

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

«___» _____ 2016 թ.

N ___-Ն

ք.Ստեփանակերտ

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅՈՒՆՈՒՄ ԳԱՐՆԱՆԱՅԱՆ
ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱԴՈՒԹՅԱՆ ԽԹԱՆՄԱՆ 2016 ԹՎԱԿԱՆԻ
ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ**

Հիմք ընդունելով «Իրավական ակտերի մասին» Լեռնային Ղարաբաղի Հանրապետության օրենքի 13-րդ հոդվածը՝ Լեռնային Ղարաբաղի Հանրապետության կառավարությունը **ո Ր Ո Շ ՈՒ Մ է**.

1. Հաստատել Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը (այսուհետ՝ Ծրագիր)՝ համաձայն հավելվածի:

2. Սահմանել, որ՝

1) Ծրագրի կատարման հսկողությունը վերապահվում է Լեռնային Ղարաբաղի Հանրապետության գյուղատնտեսության նախարարությանը.

2) Ծրագրի շրջանակներում իրականացվող միջոցառումների պատասխանատու են հանդիսանում Լեռնային Ղարաբաղի Հանրապետության շրջանների վարչակազմերը.

3) նախարարությունը տնտեսական տարին ավարտելուց հետո՝ եռամսյա ժամկետում Լեռնային Ղարաբաղի Հանրապետության կառավարություն է ներկայացնում հաշվետվություն՝ կատարած աշխատանքների և իրականացրած միջոցառումների մասին:

3. Սույն որոշումն ուժի մեջ է մտնում պաշտոնական հրապարակմանը հաջորդող տասներորդ օրը:

ԼԵՌՆԱՅԻՆ ՂԱՐԱԲԱՂԻ
ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ա. ՀԱՐՈՒԹՅՈՒՆՅԱՆ

Հավելված
Լեռնային Ղարաբաղի
Հանրապետության կառավարության
2016 թվականի _____ -ի
N _____ -Ն որոշման

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅՈՒՆ

ԾՐԱԳԻՐ

ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅՈՒՆՈՒՄ
ԳԱՐՆԱՆԱՅԱՆ ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱՌՈՒԹՅԱՆ
ԽԹԱՆՄԱՆ 2016 ԹՎԱԿԱՆԻ

ԲՈՎԱՆԴԱԿՈՒԹՅՈՒՆ

I. ԾՐԱԳՐԻ ԿԱՐԵՎՈՐՈՒԹՅՈՒՆԸ

II. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ

III. ԾՐԱԳՐԻ ԻՐԱԿԱՆԱՑՄԱՆՆ ՈՒՂՂՎԱԾ ՄԻՋՈՑԱՌՈՒՄՆԵՐԸ

IV. ԾՐԱԳՐԻ ԻՐԱԿԱՆԱՑՈՒՄԻՅ ԱԿՆԿԱԼՎՈՂ ԱՐԴՅՈՒՆՔՆԵՐԸ

I. ԾՐԱԳՐԻ ԿԱՐԵՎՈՐՈՒԹՅՈՒՆԸ

1. Գյուղատնտեսությունը երկրի պարենային ապահովության և անվտանգության ապահովման գլխավոր ոլորտն է և ընդհանուր ռազմավարության մեջ այն ունի առանցքային դեր: Նպատակային քաղաքականության իրականացման ու առկա ներուժի լիարժեք օգտագործման շնորհիվ հնարավոր է որոշակիորեն լուծել բնագավառում ծագած մի շարք խնդիրներ:

2. Քաղաքականությունը պետք է նպատակաուղղվի գյուղատնտեսական ծագում ունեցող արտադրանքի արտադրության ծավալի աճին, ներմուծվող արտադրանքը տեղական արտադրանքով փոխարինելուն, նոր տեխնոլոգիաների ներդրմանը, ինչը պահանջում է պետական աջակցության տարբեր մեխանիզմների կիրառում:

3. Գյուղատնտեսական որոշ մշակաբույսերի տեղական արտադրության ծավալներն ապահովում են ինքնաբավության ցածր մակարդակ, և առաջնահերթ խնդիրը դրանց ցանքատարածությունների, արտադրության ծավալների ավելացումն ու ինքնաբավության մակարդակի հետագա բարձրացումն է, մասնավորապես, դա վերաբերում է յուղատու մշակաբույսերին՝ արևածաղիկ, հլածուկ, սոյա (այսուհետ՝ յուղատու մշակաբույսեր), բանջարեղենին՝ պոմիդոր, պղպեղ, բադրիջան, սոխ (այսուհետ՝ բանջարեղեն), հնդկացորենին, սորգոյին և ծխախոտին: Նշված մշակաբույսերի եկամտաբերությունը տարեցտարի նվազում է՝ կատարվող ծախսերի ավելացման և բերքատվության անկման պատճառով: Լեռնային Ղարաբաղի Հանրապետության կառավարության կողմից հողօգտագործողներին տրամադրվող պետական աջակցության շարունակական ծրագրերը նպաստում են տևականորեն չմշակված վարելահողերի շրջանառության մեջ ներգրավմանը, գյուղատնտեսական մշակաբույսերի ագրոտեխնիկական միջոցառումների բարելավմանը, ցանքատարածությունների, համախառն բերքի, գյուղացիական տնտեսությունների եկամուտների ավելացմանը և տնտեսական աճի ապահովմանը:

4. Առաջնահերթ խնդիր է սեփական արտադրության հաշվին տեղական վերամշակող ընկերությունների կողմից մթերման ծավալների ու արտադրվող արտադրանքի ավելացումը, նոր աշխատատեղերի ստեղծումը, ինչպես նաև անասնակերով ապահովվածության մակարդակի բարձրացումը, որը բխում է նաև հանրապետության գյուղատնտեսության ռեսուրսային ներուժի լիարժեք օգտագործման անհրաժեշտությունից:

5. Բուսաբուծության բնագավառի ուսումնասիրությունները և վերլուծությունները ցույց են տալիս, որ յուղատու մշակաբույսերի, բանջարեղենի, հնդկացորենի, սորգոյի և ծխախոտի ցանքատարածությունների ավելացման ու ագրոտեխնիկական միջոցառումների արդյունավետ կազմակերպման համար անհրաժեշտ է հողօգտագործողներին առաջնահերթ ապահովել բարձր վերարտադրություն և բերքատվություն ապահովող սերմերով, հանքային պարարտանյութերով, ինչպես նաև այդ մշակաբույսերից ստացված բերքի մթերման դիմաց լրավճարների տրամադրման միջոցով ապահովել բերքի իրացման կայուն շուկաներ:

6. Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագրով (այսուհետ՝ Ծրագիր) ներկայացվում են Լեռնային Ղարաբաղի Հանրապետությունում 2016 թվականին գարնանացան որոշ մշակաբույսերի արտադրության խթանմանն ուղղված իրականացվելիք միջոցառումները և ակնկալվող արդյունքները:

II. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ

7. Գյուղատնտեսության բնագավառում չափազանց կարևոր է ցանքաշրջանառության կիրառումը, ցանքատարածքների կառուցվածքի բարելավումը և անասնապահության

զարգացումը: Ցանքաշրջանառության մեջ ճիշտ ընտրված մշակաբույսերի մշակությունը բարելավվում է հողի՝ ֆիտոսանիտարական վիճակը, պահպանում էռոզիայից, ավելացնում օրգանական նյութերի քանակը և բարելավվում ֆիզիկական հատկությունները: Այդ առումով յուղատու մշակաբույսերի, բանջարեղենի, հնդկացորենի, սորգոյի և ծխախոտի մշակությունը կարևորվում է ցանքաշրջանառության լավագույն բաղադրիչ լինելու, պարենային որոշ մթերքների ինքնաբավության մակարդակի բարձրացման, ինչպես նաև անասնակերերի կայուն բազայի ստեղծման տեսանկյունից:

8. Ծրագրի նպատակն է Լեռնային Ղարաբաղի Հանրապետության շրջաններում այդ մշակաբույսերի ցանքատարածությունների ու համախառն բերքի ծավալների ավելացումը և գյուղատնտեսությամբ զբաղվող տնտեսավարող սուբյեկտների եկամտաբերության մակարդակի բարձրացմանը նպաստելը:

9. Ծրագրի խնդիրներն են՝

1) գյուղատնտեսական նշանակության տարածքների արդյունավետ օգտագործման համար հնարավորությունների ստեղծում.

2) գյուղատնտեսության զարգացման համար անհրաժեշտ պայմանների ստեղծում և բնակչության աշխատունակ հատվածի համար լիարժեք զբաղվածության ապահովում.

3) վերամշակող ընկերությունների համար անհրաժեշտ քանակությամբ հումքի ապահովում:

III. ԾՐԱԳՐԻ ԻՐԱԿԱՆԱՑՄԱՆ ՈՒՂՂՎԱԾ ՄԻՋՈՑԱՌՈՒՄՆԵՐԸ

10. Ծրագրով նախատեսվում է իրականացնել հետևյալ միջոցառումները՝

1) յուղատու մշակաբույսերի, հնդկացորենի և սորգոյի սերմերի և հանքային պարարտանյութերի ձեռքբերում ու տրամադրում.

2) բանջարեղենի մշակությամբ զբաղվող անձանց փոխառության տրամադրում.

3) ծխախոտի մշակությունից ստացված բերքի իրացման (մթերման) դիմաց լրավճարի տրամադրում:

11. Ծրագրի իրականացման գործընթացում ներգրավված պետական, տարածքային կառավարման ու տեղական ինքնակառավարման մարմիններն իրականացնում են հետևյալ միջոցառումները՝

1) Լեռնային Ղարաբաղի Հանրապետության գյուղատնտեսության նախարարությունը (այսուհետ՝ նախարարություն) համակարգում և վերահսկում է Ծրագրի իրականացման գործընթացը.

2) տեղական ինքնակառավարման մարմինները, հիմք ընդունելով յուղատու մշակաբույսերի, բանջարեղենի, հնդկացորենի, սորգոյի և ծխախոտի մշակությամբ զբաղվելու ցանկություն ունեցող հողօգտագործողների դիմումները, վարելահողերի նկատմամբ սեփականության, վարձակալության կամ անհատույց օգտագործման իրավունքի պետական գրանցման վկայականների (այսուհետ՝ վկայական), իսկ վերաբնակեցման տարածքներում վկայականի բացակայության դեպքում համայնքի ղեկավարի կողմից տրված համապատասխան տեղեկանքի և անձնագրերի պատճենները, շրջանների վարչակազմերի սահմանած ժամկետում շրջանների վարչակազմեր են ներկայացնում իրենց կողմից հաստատված տեղեկանք՝ նշելով հողօգտագործողի անունը, ազգանունը, հայրանունը, վկայականի համարը, մշակաբույսերը և դրանց մշակության համար նախատեսված տարածքների մակերեսները: Համայնքների վարչական սահմաններից դուրս գտնվող պետական սեփականություն համարվող վարելահողերի վարձակալները փաստաթղթերը ներկայացնում են համապատասխան շրջանի վարչակազմի աշխատակազմի գյուղատնտեսության բաժին.

3) Լեռնային Ղարաբաղի Հանրապետության շրջանների վարչակազմերը մինչև 2016 թվականի ապրիլի 30-ը նախարարություն են ներկայացնում Ծրագրի 11-րդ կետի 2-րդ ենթակետում նշված տեղեկությունները:

12. Պետական աջակցության տրամադրման հիմք են հանդիսանում Ծրագրի 11-րդ կետի 3-րդ ենթակետում և 13-րդ կետի 3-րդ ենթակետի «գ» պարբերությունում նշված տեղեկությունները:

13. Պետական աջակցությունը տրամադրվում է՝

1) Լեռնային Ղարաբաղի Հանրապետության շրջանների վարչական սահմաններում սեփականության, վարձակալության և անհատույց օգտագործման իրավունքով հատկացված վարելահողերում յուղատու մշակաբույսեր, հնդկացորեն և սորգո մշակելու համար՝ 1 հեկտարի համար սահմանված համապատասխան քանակությամբ սերմի և հանքային պարարտանյութերի տեսքով, անհատույց (տրամադրվող սերմի և հանքային պարարտանյութերի սահմանված քանակները ներկայացված են աղյուսակում): Աջակցությունը կտրամադրվի Լեռնային Ղարաբաղի Հանրապետության գյուղի և գյուղատնտեսության աջակցության հիմնադրամի (այսուհետ՝ հիմնադրամ) միջոցով՝ նախարարության կողմից ներկայացված համապատասխան տեղեկության հիման վրա.

2) Լեռնային Ղարաբաղի Հանրապետության շրջանների վարչական սահմաններում սեփականության, վարձակալության և անհատույց օգտագործման իրավունքով հատկացված վարելահողերում բանջարեղեն մշակելու համար՝ 1 հեկտարի դիմաց 200 000 ՀՀ դրամ գումար: Աջակցությունը կտրամադրվի հիմնադրամի միջոցով փոխառության տեսքով՝ նախարարության կողմից ներկայացված համապատասխան տեղեկության հիման վրա.

3) Լեռնային Ղարաբաղի Հանրապետության շրջանների վարչական սահմաններում սեփականության, վարձակալության և անհատույց օգտագործման իրավունքով հատկացված վարելահողերում մշակած ծխախոտից ստացված բերքի իրացման (մթերման) դիմաց տրամադրվում է լրավճար՝ 1 կիլոգրամի դիմաց 15 ՀՀ դրամ գումարի չափով հետևյալ ձևով՝

ա. լրավճարը տրամադրվում է Լեռնային Ղարաբաղի Հանրապետության տարածքում գործող ընկերություններին մթերված բերքի դիմաց,

բ. մթերող ընկերությունները 15 աշխատանքային օրվա ընթացքում հողօգտագործողին են վճարում հանձնված բերքի դիմաց ողջ գումարը՝ ներառյալ ծրագրով նախատեսված լրավճարը,

գ. մթերող ընկերությունները յուրաքանչյուր ամիս տեղեկություններ են ներկայացնում նախարարություն՝ նշելով բերք հանձնած հողօգտագործողի անունը, ազգանունը, հայրանունը, անձը հաստատող փաստաթղթի համարը, մթերված բերքի քանակը,

դ. նախարարությունը սույն կետի 3-րդ ենթակետի «գ» պարբերությունում նշված տեղեկությունները ստանալուց հետո, տասնօրյա ժամկետում ընդհանրացնում և դրանց հիման վրա Լեռնային Ղարաբաղի Հանրապետության ֆինանսների նախարարություն է ներկայացնում հայտ՝ նշելով մթերող ընկերությունների անվանումները,

ե. Լեռնային Ղարաբաղի Հանրապետության ֆինանսների նախարարությունը վերը նշված հայտը ստանալուց հետո գարնանացան մշակաբույսերի ցանքաշրջանառության ծրագրերի խթանման համար Լեռնային Ղարաբաղի Հանրապետության 2016 թվականի պետական բյուջեով նախատեսված միջոցներից սահմանված կարգով հատկացնում է համապատասխան ֆինանսական միջոցները:

IV. ԾՐԱԳՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ

14. Ծրագրի իրականացումից նախատեսվում է յուղատու մշակաբույսերի ցանքատարածքները հասցնել 2350 հեկտարի, այդ թվում արևածաղիկ՝ 2000 հեկտար, իլածուկ՝ 250 հեկտար, սոյա՝ 100 հեկտար, սորգոյինը՝ 200 հեկտարի, հնդկացորենինը՝ 700 հեկտարի, իսկ

վերամշակող ընկերություններում հողօգտագործողներից մթերել շուրջ 2000 տոննա ծխախոտի հումք: Փոխառությունը կտրամադրվի 400 հեկտար բանջարեղենի մշակության համար, այդ թվում՝ 250 հեկտար սոխ:

15. Յուղատու մշակաբույսերը, հնդկացորենը և բանջարեղենը հումք են հանդիսանում վերամշակող ընկերությունների համար: Յուղատու մշակաբույսերի վերամշակումից ստացված ձեթը, հնդկացորենից՝ հնդկաձավարը և բանջարեղենից՝ պահածոները հանդիսանում են առաջին անհրաժեշտության պարենամթերք և ունեն մեծ դեր ու նշանակություն մարդու օրգանիզմի նորմալ գործունեության համար: Սորգոյից ստացվում է անասնակեր, որը կնպաստի անասնաբուծության զարգացմանը:

Աղյուսակ

Հ/հ	Մշակաբույսը	Տրամադրվող սերմի քանակը (կգ)	Տրամադրվող ինոկուլյանտի քանակը (գ)	Տրամադրվող պարարտանյութի քանակը (կգ)		
				ազոտ	ֆոսֆոր	կալիում
1	Հնդկացորեն	70		50	100	
2	Արևածաղիկ	5		50	50	150
3	Հլածուկ	6		50	50	100
4	Սոյա	80	300		100	100
5	Սորգո	10		50	100	

ԼԵՌՆԱՅԻՆ ՂԱՐԱԲԱԴԻ ՀԱՆՐԱՊԵՏՈՒԹՅԱՆ
 ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
 ԴԵԿԱՎԱՐ -ՆԱԽԱՐԱՐ
 Լ.ԳՐԻԳՈՐՅԱՆ

ՀԻՄՆԱՎՈՐՈՒՄ

«ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅՈՒՆՈՒՄ ԳԱՐՆԱՆԱՅԱՆ ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱՌՈՒԹՅԱՆ ԽԹԱՆՄԱՆ 2016 ԹՎԱԿԱՆԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ» ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ՈՐՈՇՄԱՆ ՆԱԽԱԳԾԻ

Անհրաժեշտությունը

Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագրով ներկայացվում են Լեռնային Ղարաբաղի Հանրապետությունում 2016 թվականին գարնանացան որոշ մշակաբույսերի արտադրության խթանմանն ուղված իրականացվելիք միջոցառումները և ակնկալվող արդյունքները:

Ծրագիրը նպատակաուղղված է Լեռնային Ղարաբաղի Հանրապետության շրջաններում գարնանացան որոշ մշակաբույսերի ցանքատարածությունների և համախառն բերքի ծավալների ավելացմանը և գյուղատնտեսությամբ զբաղվող տնտեսավարող սուբյեկտների եկամտաբերության մակարդակի բարձրացմանը:

Ընթացիկ իրավիճակը և խնդիրները

Գյուղատնտեսությունը երկրի պարենային ապահովության և անվտանգության ապահովման գլխավոր ոլորտն է: Ընդհանուր ռազմավարության մեջ այն ունի առանցքային դեր և նպատակային քաղաքականության իրականացման ու առկա ներուժի լիարժեք օգտագործման շնորհիվ հնարավոր է որոշակիորեն լուծել բնագավառում ծագած մի շարք խնդիրներ: Գարնանացան որոշ մշակաբույսերի արտադրության ծավալներն ապահովում են ինքնաբավության ցածր մակարդակ և առաջնահերթ խնդիրը դրանց ցանքատարածությունների, արտադրության ծավալների ավելացումն ու ինքնաբավության մակարդակի հետագա բարձրացումն է:

Նպատակը և բնույթը

Ծրագրի նպատակն է Լեռնային Ղարաբաղի Հանրապետության շրջաններում գարնանացան որոշ մշակաբույսերի ցանքատարածությունների ու համախառն բերքի ծավալների ավելացումը և գյուղատնտեսությամբ զբաղվող տնտեսավարող սուբյեկտների եկամտաբերության մակարդակի բարձրացմանը նպաստելը, արժանավայել ու անվտանգ ապրելու և բարիքներ ստեղծելու համար նախադրյալների ստեղծումը:

Ակնկալվող արդյունքը

Ծրագրի իրականացումից ակնկալվում է յուղատու մշակաբույսեր, բանջարեղենի, հնդկացորենի, սորգոյի և ծխախոտի ցանքատարածությունների, արտադրության ծավալների ավելացումն ու ինքնաբավության մակարդակի հետագա բարձրացումն է, ինչպես նաև տևականորեն չմշակված վարելահողերը շրջանառության մեջ ներգրավումը, գյուղացիական տնտեսությունների եկամուտների ավելացումը և տնտեսական աճի ապահովում:

Նախագծի մշակման գործընթացում ներգրավված անձինք

Նախագիծը մշակվել է Լեռնային Ղարաբաղի Հանրապետության գյուղատնտեսության նախարարության աշխատակազմի բուսաբուծության և բույսերի պաշտպանության,

գյուղատնտեսության ծրագրավորման և ագրովերամշակման և իրավաբանական բաժինների կողմից:

Այլ տեղեկություններ

«Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը հաստատելու մասին» Լեռնային Ղարաբաղի Հանրապետության կառավարության որոշման նախագիծը սահմանված կարգով դրվել է հանրային քննարկման Լեռնային Ղարաբաղի Հանրապետության գյուղատնտեսության նախարարության պաշտոնական կայքէջում: Սահմանված ժամկետներում առաջարկություններ կամ դիտողություններ չեն ստացվել:

**ԼՂՀ ԳՅՈՒՂԱՏՆՏԵՍՈՒԹՅԱՆ
ՆԱԽԱՐԱՐ**

Ա.ՄԽՈՅԱՆ

ՏԵՂԵԿԱՆՔ

«ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅՈՒՆՈՒՄ ԳԱՐՆԱՆԱՅԱՆ ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱՌՈՒԹՅԱՆ ԽԹԱՆՄԱՆ 2016 ԹՎԱԿԱՆԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ» ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԿԱՊԱԿՑՈՒԹՅԱՄԲ ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԿԱՄ ՏԵՂԱԿԱՆ ԻՆՔՆԱԿԱՌԱՎԱՐՄԱՆ ՄԱՐՄԻՆՆԵՐԻ ԲՅՈՒՋԵՆԵՐՈՒՄ ԾԱԽՍԵՐԻ ԵՎ ԵԿԱՄՈՒՏՆԵՐԻ ԷԱԿԱՆ ԱՎԵԼԱՅՈՒՄՆԵՐԻ ԿԱՄ ՆՎԱՋԵՑՈՒՄՆԵՐԻ ՄԱՍԻՆ

«Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը հաստատելու մասին» Լեռնային Ղարաբաղի Հանրապետության կառավարության որոշման նախագծի ընդունման կապակցությամբ Լեռնային Ղարաբաղի Հանրապետության պետական կամ տեղական ինքնակառավարման մարմինների բյուջեներում ծախսերի և եկամուտների ավելացումներ կամ նվազեցումներ չեն նախատեսվում:

ՏԵՂԵԿԱՆՔ

«ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅՈՒՆՈՒՄ ԳԱՐՆԱՆԱՅԱՆ ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱՌՈՒԹՅԱՆ ԽԹԱՆՄԱՆ 2016 ԹՎԱԿԱՆԻ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ» ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ ԱՌՆՉՈՒԹՅԱՄԲ ԱՅԼ ԻՐԱՎԱԿԱՆ ԱԿՏԵՐԻ ԸՆԴՈՒՆՄԱՆ ԱՆՀՐԱԺԵՇՏՈՒԹՅԱՆ ԿԱՄ ԲԱՑԱԿԱՅՈՒԹՅԱՆ ՄԱՍԻՆ

«Լեռնային Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը հաստատելու մասին» Լեռնային Ղարաբաղի Հանրապետության կառավարության որոշման նախագծի ընդունման առնչությամբ այլ իրավական ակտերի ընդունման անհրաժեշտություն չի առաջացնում:

ՆԱԽԱՐԱՐ

Ա. ՄԻՈՅԱՆ

ԻՐԱՎԱԿԱՆ-ՓՈՐՁԱԳԻՏԱԿԱՆ ԵԶՐԱԿԱՅՈՒԹՅՈՒՆ
«ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅՈՒՆՈՒՄ ԳԱՐՆԱՆԱՅԱՆ
ՄՇԱԿԱԲՈՒՅՍԵՐԻ ՑԱՆՔԱՇՐՋԱՆԱՌՈՒԹՅԱՆ ԽԹԱՆՄԱՆ 2016 ԹՎԱԿԱՆԻ
ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ» ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ՈՐՈՇՄԱՆ ՆԱԽԱԳԾԻ ՎԵՐԱԲԵՐՅԱԼ

«Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը հաստատելու մասին»
Լեռնային Ղարաբաղի Հանրապետության կառավարության որոշման նախագծի վերաբերյալ առաջարկություններ և դիտողություններ չկան:

ԼՂՀ ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅԱՆ
ԱՇԽԱՏԱԿԱԶՄԻ ԻՐԱՎԱԲԱՆԱԿԱՆ ԲԱԺՆԻ ՊԵՏԻ
ՊԱՇՏՈՆԱԿԱՏԱՐ
ԳՐԻԳՈՐՅԱՆ

Ն.

**ԼՂՀ ԿԱՌԱՎԱՐՈՒԹՅԱՆ ԵՎ ԼՂՀ ՎԱՐՉԱՊԵՏԻ
ՈՐՈՇՈՒՄՆԵՐԻ ԱՌԱՔՄԱՆ ԹԵՐԹԻԿ**

Որոշման նախագծի անվանումը՝

«Լեռնային Ղարաբաղի Հանրապետությունում գարնանացան մշակաբույսերի ցանքաշրջանառության խթանման 2016 թվականի ծրագիրը հաստատելու մասին»

Նախագիծը ներկայացնողը՝

ԼՂՀ գյուղատնտեսության նախարարություն

ԼՂՀ կառավարության և ԼՂՀ վարչապետի որոշումներն ուղարկել՝

1. ԼՂՀ գյուղատնտեսության նախարարություն
2. ԼՂՀ արդարադատության նախարարություն
3. ԼՂՀ ֆինանսների նախարարություն
4. ԼՂՀ գյուղի և գյուղատնտեսության աջակցության հիմնադրամ
5. ԼՂՀ շրջաններ

Նախագիծը պատրաստողը՝

ԼՂՀ գյուղատնտեսության նախարարության աշխատակազմի բուսաբուծության և բույսերի պաշտպանության բաժին

Ավետիսյան

_____ Վ.
(ստորագրությունը)

« _____ » _____ 2016թ.